

MB Kedah mohon maaf di hadapan PM, menteri

Jitra: Datuk Seri Muhammad Sanusi Md Nor malam kelmarin mengambil kesempatan memohon maaf di hadapan Perdana Menteri, Datuk Seri Anwar Ibrahim dan beberapa menteri Kabinet pada Majlis Sambutan Aidilfitri MADANI peringkat negeri Kedah.

Muhammad Sanusi berkata, permohonan maaf itu adalah bagi ucapannya yang kurang sesuai dalam konteks 'hablum-minannas' (hubungan sesama manusia) selama beliau berkhidmat sebagai Menteri Besar Kedah dan atas kapasiti politik.

"Sebagai insan lemah, keterlanjuran dan kesilapan pastinya

ada dalam diri masing-masing. Semoga pertemuan pada Syawal yang mulia ini akan menjadi asbab untuk kita mulakan lembaran baharu serta sama-sama melangkah dengan hati yang bersih, ikhlas dan bertanggungjawab," katanya dalam ucapan.

Menegaskan kepentingan rakyat harus mengatasi keghairahan untuk mengekalkan kuasa politik dan segala perkara yang bersifat politik sepatutnya hanya dibawa ke medan politik, Muhammad Sanusi yang juga Timbalan Pesuruhjaya PAS Kedah berharap Kerajaan Persekutuan sentiasa memberikan perhatian dan tidak meminggirkan negeri ini.

Pada majlis yang turut dihadiri Timbalan Perdana Menteri, Datuk Seri Dr Ahmad Zahid Hamidi, beberapa menteri Kabinet serta kira-kira 15,000 tetamu itu, beliau turut merakamkan penghargaan kepada Perdana Menteri yang memberi perhatian kepada projek pembangunan di negeri ini, terutama di kawasan luar bandar.

Sementara itu, Menteri Besar ketika ditemui media selepas Majlis Penjenamaan Semula Pusat Teknologi Mempelam Sala Kanan kepada Pusat Mempelam Kedah di Yan semalam, kecewa sikap segelintir netizen yang mempersendakan permohonan

maaf pada majlis di Jitra itu.

Beliau menyifatkan warganet yang gemar mengkritik kebajikan yang dilakukan orang lain sebenarnya mewarisi sifat syaitan, sedangkan ucapan maaf itu adalah ikhlas dari lubuk hatinya sebagai manusia biasa.

"Kalau jumpa di mana-mana pun, orang lebih tua pada saya, macam itulah gaya saya, saya bukan berlakon, saya jadi diri saya yang sebenar.

"Saya nampak komen di media sosial, baik pun salah, tak baik pun salah, jadi depa semua itu syaitan. Kalau kita berbuat baik sesama umat manusia pun tidak disukai, itu kerja syaitan.

"Bila orang sakit hati tengok satu benda baik, dia mewarisi sifat syaitan. Jadi, berhentilah jadi syaitan, jadilah manusia," katanya mengulas tindakan segelintir pihak melukis kari-katur beliau tunduk memohon maaf kepada Anwar bersama dialog 'Mohon maaf ler, mulut saya memang kurang ajaq, Kelantan dah dapat, Kedah bila lagi?'

Katanya, sebagai umat Nabi Muhammad SAW pada akhir zaman, umat Islam perlu melakukannya sebanyak mungkin kebaikan, perkara yang baik patut disuburkan dan memohon maaf menandakan seseorang itu berjiwa besar.